

東
華
續
錄

東華續錄

同治三十九

臣王先謙敬編

臣張式恭恭校

冬十月戊辰朔諭議政王軍機大臣等偕格林沁奏督軍進剿西
竄股匪偪賊東趨官文奏髮捻東趨與蘄水之賊句合見籌剿辦
情形各一摺逆匪盤踞新店雙山門等處經陳國瑞等軍擊敗遁
入楚疆偕格林沁進紮商城而捻匪張總愚率眾回竄官軍敗之
於木子店復向西南白果一帶狂奔陳國瑞姜玉順等督軍扼剿
疊有斬擒該逆已東竄上巴河蘄水一帶與下游大股髮捻句合
是楚北西路可保無虞而逆勢既歸併一處則下游倍形喫重皖
楚之交山重水複馬隊萬難施展著官文卽飭姜玉順蕭河清等
軍銳意東行會合成大吉之軍內外夾擊務將此股賊匪就地殲

除母任再行西竄其劉連捷一軍並著官文飛檄催提飭令自東而西與鄂軍兩面圍攻大彰捷伐成保陳國瑞扼紮羅田邊賊西北竄路李濟清等水師嚴扼辛家沖一帶以防搶渡卽著僧格林沁官文分飭各軍嚴密堵禦以備鈔擊僧格林沁見已移紮黃岡之上巴河擬俟賊蹤竄近平原督率馬隊追擊該大臣惟當穩慎進取毋稍疏虞將此由六百里各諭令知之○福建巡撫徐宗幹奏汀軍出境剿賊獲勝並請免林文察處分得旨著卽飭令張運蘭等軍分道嚴密邊剿務將股賊盡殲毋令擾及完善林文察被參赴調延緩處分著加恩寬免○廣西巡撫張凱嵩奏分勦思恩南甯匪徒獲勝得旨仍著飭令易元泰等軍乘勝進攻將首要各犯盡數殲除毋稍鬆懈○楊岳斌請回湘募勇赴甘肅許之諭湖北等省籌解楊岳斌軍需○命刑部尙書綿森戶部左侍郎吳廷

棟往治察哈爾獄○己巳諭改烏魯木齊提督文祥名爲文祺○
庚午諭議政王軍機大臣等都興阿奏豫籌出關剿賊情形一摺
據稱體察刻下情形出關一節非馬隊不能得力請飭吉林挑兵
一千名黑龍江撥官兵及西丹閒散一千名等語吉林黑龍江馬
隊節經各路軍營奏調爲數不少且因東三省邊防緊要亦經准
該將軍等所請停止再調惟回疆事體重大將來都興阿進兵必
須馬隊方能制賊死命著該將軍等酌量情形如尙可以抽撥卽
著按照都興阿所請數目先行挑備聽候都興阿調遣見在東南
軍務大定各路所調馬隊陸續撤回卽可以補此缺額並著該將
軍等斟酌辦理將此由六百里各諭令知之○諭都興阿奏逆賊
撲犯營壘官軍擊剿獲勝並籌議剿辦新疆回匪各摺片逆首馬
叱咤糾集馬步賊匪撲犯官軍營壘經杜嘎爾督飭托克屯揮軍

迎擊斃賊七八百名剿辦尙屬得手第該逆狡黠異常探知我軍地廣兵單難保不再來窺撲且甯夏之賊復於上游放水洩浸滿城尤應亟籌宣洩著都興阿督率杜嘎爾等嚴密防剿毋稍大意一面催令定安統帶練勇搶奪大壩牘口趕緊設法宣洩水勢以保危城見在楊岳斌回籍選募精勇七八千名赴甘尙需時日都興阿督軍勦辦甘回正當喫緊非俟楊岳斌大枝勁旅到甘萬難出關剿賊所請飭派明慶等統帶所調馬隊來甘助剿及請飭僧格林沁抽撥官兵交成保統帶之處屆時再降諭旨將此由六百里諭令知之○辛未諭內閣伊犁將軍常清自到任以來於邊防事務一切未能整頓本年庫車等處回匪煽亂該將軍有統轄各城之責事前既未能防範事後又未能設法趕緊撲滅實屬庸懦無能大負委任且有被參謬妄貪婪各款常清著卽行革職仍留

伊犁聽候查辦○諭議政王軍機大臣等惲世臨奏楚師防剿黔匪肅清沅晃邊境及籌防江西竄賊情形暨包茅仙被擒自刎各摺片黔匪勾結下竄擾及湖南沅晃邊境經周洪印等分路剿擊各有斬獲沅晃境內已無賊蹤戈鋌等復由邦洞一帶越境進剿連破賊巢仍著惲世臨督飭各軍實力扼擊以剿爲防毋稍鬆懈前因李七股匪由王家司竄至荔波縣屬拜讓地方黔省兵力不敷剿辦曾經諭令惲世臨飭令周洪印迅統所部由荔波一帶進剿見在該撫飭周洪印酌派數營駐黎靖之交埽蕩天柱各匪卽著該撫酌量緩急相機調遣江西之賊勢窮紛竄見在瑞金雩都已復鮑超率師直下步步追躡正須楚軍會同夾擊方可收聚殲之效惲世臨見飭趙煥聯等分扼上猶龍泉陳士杰等軍照舊布置所籌尙妥卽著飭令各軍與江省官軍互相聯絡迅殄賊氛包

逆被擒自刎黔楚邊界已除一巨患該逆倡亂多年恐不免餘匪
潛匿仍著飭令在事各員弁實力搜捕以清餘孽將此由五百里
諭令知之○諭前據武隆額德明奏參常清劣蹟多端聲名狼藉
嗣又據武隆額奏查出牧廠虧短馬匹各摺片據稱常清居官辦
事軍民同深憤恨甚至有常口袋常錢串子之號揀選協領任意
黜陟徇庇解任聽審之巴哈善意存開脫羅世瑤一案有該將軍
門丁吳姓在內延不交出屬令委員偏供刑嚇意在致死滅口緣
營出有官缺積壓一年有餘未經出奏需索守備夏正嵐頭未遂
意欲羅致重罪以找買馬爲名徧地按羅以致軍民不敢養馬傳
聞所得馬匹轉售外夷及馬差沿途代爲變價凡有呈遞馬嵐銀
物者皆係章京圖姓達姓與門丁吳姓等互爲綫索將自存頂翎
貂皮等物賣與哈薩克等錮銖必較私宅工作或取諸軍民或勒

令屬員代辦該將軍因命名常清凡公牘中遇有清字必令改避於勘分地界一事一概推諉爲卸肩地步察哈爾營牧廠官馬僅存五百餘匹虧短四千四百餘匹之多該將軍因每年需索馬匹售賣獲利遂任令管馬官員虛蒙出結代爲隱瞞以致馬政大壞各等語西陲重地極關緊要將軍駐紮伊犁有總統各城之責必須公正廉明方足以資治理乃如所參各節是常清居心卑鄙辦事謬妄全不以國事爲重安望其表率僚屬綏靖地方且見在新疆各城回匪煽亂伊犁地方防守尤重該將軍平時既眾怨繁興又安能固結人心同資保衛本日業經明降諭旨將常清革職聽候查辦明緒見在新授伊犁將軍無所用其回護著將所參各款詳細查明據實具奏不准一字欺飾原摺片四件均著鈔給閱看將此諭令知之○諭常清明緒奏援兵剿辦庫城回匪獲勝並委

統兵大員救援烏城常清奏接奉諭旨憑陳惶悚下忱明緒奏抵任大概情形各摺片覽奏均悉常清身膺邊寄毫無振作本日已明降諭旨將伊革職伊犁將軍卽命明緒補授矣明緒受朝廷倚畀重恩務當振刷精神於一切防剿撫綏各事宜力求整頓不可稍有懈怠因循致蹈常清覆轍圖庫爾一軍行抵庫爾喀喇烏蘇擊賊獲勝自應一鼓作氣將逃匿禮拜寺之賊悉數殲除武隆額隨同圖庫爾一路行走旣據常清等奏稱該員遇賊接仗深合機宜甚屬可嘉本日已將武隆額賞給副都統銜補授喀喇沙爾辦事大臣所有救援烏城之兵卽著暫由武隆額調度自領隊大臣以下均歸節制武隆額其督帶各軍鼓勇前進迅解烏城之圍疏通咽喉重地此次援兵甫到庫城卽能得手可見官兵果能奮勇直前不肯避賊必可力挫兇鋒明緒當督同武隆阿激勵將士敵

愾同仇務令壁壘一新肅清邊徼以副委任哈密爲新疆門戶回
匪既有句結安集延霍罕分赴哈密烏魯木齊打仗之謠自應嚴
密防範著明緒行知平瑞文祺扎克當阿加意準備北路之塔爾
巴哈台等處著一併咨令錫霖等嚴爲籌備不可稍涉大意至新
疆軍餉疊經照戶部所撥諭令山西等省趕緊撥解此時諒已陸續
起解在途明緒即可分別咨催迎提內地精兵業經設法籌調
出關剿賊惟到尙需時明緒總當就見有之兵實力防剿遣勇既
易滋事或添募民勇加以訓練藉厚兵力不可專待援師致誤戎
機金頂寺回子意欲變亂見經開導解散所辦甚好仍著隨時撫
輯令其各安生業以遏亂萌嗣後非極緊要軍情不准擅發八百
里報致駭聞聽將此由六百里各諭令知之○以明緒爲伊犁將
軍聯捷爲伊犁參贊大臣調惠慶爲古城領隊大臣賞候選郎中

李雲麟三等侍衛爲庫爾喀喇烏蘇領隊大臣○賞葉爾羌幫辦大臣武隆額副都統銜爲喀喇沙爾辦事大臣○飭催新疆換班各員赴任○壬申諭議政王軍機大臣等丁曰健奏前往彰化督勦並辦理善後事宜一摺北路股首洪權恃與番界接壤往來莫定負隅抗拒馬莽潭匪首陳鯨等亦恃竹園堅厚暗結黨與狡焉思逞若不速加殲滅恐日久死灰復然勢將仍肆蔓延致勦辦又形棘手丁曰健見於九月初十日帶領兵勇前往北路彰化一帶督勦著左宗棠徐宗幹督飭丁曰健統率所部認真接捕務將洪機等逆首悉數擒獲並將餘匪勦除淨盡以竟全功而清疆圉其一切善後事宜卽著丁曰健妥爲經理副將林文明以本地之人辦本地之賊自不免致招嫌隙所有內山接捕事宜卽著責成該鎮道接辦毋庸林文明前往署總兵曾元福見在回臺清理積欠

口糧並裁撤疲病各勇卽著照丁曰健所擬暫畱郡垣另行察看情形辦理丁曰健見赴彰化勦匪所需兵勇口糧亟應寬爲籌備著左宗棠徐宗幹飭令臺灣府知府陳懋烈於萬難設法之中竭力籌措並著丁曰健自行湊借俾供支放毋令缺乏將此由五百里諭知左宗棠徐宗幹並傳諭曾元福丁曰健知之○癸酉諭議政王軍機大臣等曾國藩奏官軍驅賊出境皖南北兩岸肅清沈葆楨奏鮑超飛援甯都血戰解圍並席寶田一軍剪除湖逆接獲偽酋及龍南縣擊賊獲勝各摺片英霍之賊退竄鄂疆徧擾蘄水蘄州等處皖北雖暫就肅清未能恃以無恐蔣凝學一軍已到蘄水劉連捷軍亦經官文調往湖北見在成大吉被圍湖北軍情十分喫緊著曾國藩懷遵疊次諭旨飭令劉連捷迅卽赴援湖北其皖楚交界地方仍責令朱南桂等嚴密防守毋任回竄皖南之賊

經易開俊等出嶺追勦急走遂安並陷開化漏逸而西者尙有數千人由江竄粵頭頭是道曾國藩仍當飭令易開俊金國琛等跟蹤出境追勦務須數省合力將此股殘匪殄除淨盡未可以鄰爲壑致令死灰復燃沈葆楨所奏鮑超援甯都血戰解圍已降旨賞戴雙眼花翎該撫卽傳知該提督益圖奮勉將濂侍等逆悉數誅鋤肅清江境用副委任席寶田一帶翦除湖逆據生擒賊供佑逆李遠繼已殞於陣幼逆洪幅瑱或謂死於亂軍或稱自經山僻俱屬渺茫不定僞主將羅逆王逆亦俱漏網恐遺孽復萌再有句結又形費手著沈葆楨飭席寶田等確切查明幼逆所在認真接捕以淨根株左宗棠徐宗幹亦當督飭各路地方將領嚴密捕拏爲一勞永逸之計沈葆楨另片奏南雄之賊犯龍南洒源堡及插林坳背等處經署令蔣如琳等督勇轟擊斃匪甚多餘匪竄向定南

廳而去此處與廣東地方交界著毛鴻賓郭嵩燾飭令地方文武嚴防竄越並派兵出境追剿以免再有闖入沈葆楨仍當責令地方文武員弁認真防剿如賊勢尙眾卽酌量抽調數營前往會同粵軍合力剿洗正在寄諭間據毛鴻賓等奏匪撲南雄州城官軍迎擊疊勝賊趨東路見飭臬司督兵出省防剿另片奏賊由江西安遠長甯竄入平遠縣城知縣吳炳綬中槍墜馬等語南雄賊匪被擊退竄復由江西之龍南竄入和平龍川境內幸各縣均有準備遂橫竄嘉應州界之長田和平龍川交界之下車等處毛鴻賓等已飛飭鄭紹忠由龍南馳赴連平與崑壽所派之常秀各軍互爲聯絡並令知府吳贊誠等扼紮州境防剿著卽催令李福泰籌添兵勇統帶出省赴南雄一路妥籌剿辦毋任匪蹤紛竄並嚴飭方耀等軍迅行規復平遠縣城以贖前愆粵省與江西湖南犬牙

相錯在在接壤粵東一日不得肅清江西湖南卽一日不能安枕
與其糜經費以籌防不若合羣力以制賊著沈葆楨卽飭王文瑞
一軍由贛南一帶長驅入粵會合惠潮各軍以剿東江之賊惲世
臨卽令趙煥聯一軍由桂陽桂東入粵會合南韶各軍以遏北江
之衝均須剋日赴援不得稍分畛域致誤戎機毛鴻賓等當飭令
李福泰先就見有兵力迅圖剿辦不可坐待客兵遷延時日將此
由六百里各諭令知之○張之萬等奏捻逆由白杲竄上巴河見
飭各軍扼剿得旨著該撫卽飭前敵各軍乘勝進擊並飭張曜趙
鴻舉等嚴扼商城一帶關隘防剿兼施毋任再行北竄○以江西
甯都縣城解圍提督鮑超得旨嘉獎並賞雙眼花翎餘升敘有差
予陣亡遊擊牟占魁等祭葬世職加等○以江西廣昌擊賊獲勝
開復降補知府席寶田處分仍以按察使用賞還勇號布政使銜

予陣亡遊擊夏基鴻等祭葬世職加等○乙亥諭議政王軍機大臣等保恆奏烏魯木齊省垣失守請派兵出關剿賊並請於科布多揀員統轄蒙古官兵各摺片覽奏曷勝焦憤烏魯木齊滿城固守數月仍被回匪攻陷緩來縣城亦被賊踞哈密漢回又乘勢變亂將關鄉等處焚掠巴里坤漢回聞哈密之變亦遷移不知去向南北兩路徧地皆賊烏魯木齊爲新疆扼要之區今旣淪陷全局震動必須先將此城克復再行剿辦各路之賊惟關外旣無得力之員又無熟習戰陣之將楊岳斌回湘募勇急切不能到甘都興阿旣不能出關剿賊穆圖善身歷行陣屢立戰功奉命督師援甘復能激勵士卒踊躍前驅深堪嘉尚著卽統率全部出關剿賊如兵力不敷剿辦或先駐紮哈密以爲將來進兵地步該將軍見由中部一路進援甯靈此時旣須出關自應探明道路前進俾無阻

滯之虞見在鹽固等處均有賊蹤是否仍須繞赴蘭州省城由涼
肅一帶出關抑甯羅池北關外尙有可通之路均由該將軍探明
前進以期妥速穆圖善改道出關甯靈一帶之賊著都興阿就見
有兵力妥籌剿辦但兵力實形單薄綏遠歸化等城兵力如果足
資防禦卽著桂成仍遵前旨於該二城挑選精壯兵丁一千備齊
器械迅赴都興阿軍營聽候調遣從前剿辦西路之賊川陝兵勇
最能得力雷正綰籍隸川省能否派員回籍添募若干卽著酌量
辦理其各路援兵未到之先都興阿須穩慎進取聯絡甯夏官兵
力圖扼守不可稍涉大意穆圖善所部已有十二營本日又諭令
官文催調溫德勒克西等馬隊迅赴該將軍軍營兵數愈多糧餉
尤須寬爲籌備前據德勒克多爾濟奏山西解到銀八萬兩委員
解往科布多交納惟杯水車薪難敷分撥此項餉銀陝甘旣不能

籌撥止可於晉省設法騰那著沈桂芬無論可款先其所急迅籌銀二三十萬兩解赴穆圖善軍營俾得迅速出關勦辦嗣後仍須源源接濟毋令缺乏當此時勢艱窘務當力任其難通盤籌畫並著迅速覆奏以慰廑懷師行糧隨必須有轉運糧臺方可不誤餉糈從前西路用兵多於肅州等處安設糧臺以資轉運著都興阿恩麟斟酌情形何處可以安設卽於得力道府中酌派一人經理以專責成穆圖善未出關之先仍著明緒督飭武隆額由庫爾喀喇烏蘇進兵先復綏來縣城疏通道路由昌吉一路進剿並由保恆飛催惠慶馳赴古城統帶蒙古援兵星速前進以期兩面夾擊迅復烏垣毋稍延緩平瑞不知下落烏魯木齊都統著保恆暫行署理烏垣等處文武下落著查明具奏一面將見存蒙古官兵並烏科等處調到蒙兵妥籌調度科布多地方亦關緊要廣鳳已派

往辦分界事宜保恆所請由該城大臣揀調一員來古督同辦理
著毋庸議本日廣鳳奎昌奏續撥二起蒙兵起程赴古嗣後無可
再撥等語自係實在情形所有科城蒙兵卽著毋庸再撥此項蒙
兵到古時卽由保恆等分別調遣可也將此由六百里諭知都興
阿穆圖善雷正綰明緒保恆武隆額德勒克多爾濟桂成廣鳳奎
昌沈桂芬並傳諭恩麟知之○諭新疆各城自庫車喀喇沙爾葉
爾羌烏魯木齊滿城亦已失陷並聞巴里坤哈密一帶均有回匪
擾亂是新疆情形極爲喫緊邊疆重地亟應及早廓清惟該處向
來用兵必須內地籌調大枝勁旅寬撥餉需方能布置裕如大張
撻伐見在甘肅軍務尙無就緒道路亦未通暢而湖北賊氛未淨
礙難騰出兵力赴甘援剿是欲剿關外之賊必須先清甘省欲清
甘省非將竄擾楚豫皖三省之賊迅速殄除則兵力實爲牽掣不

能鼓行而西前諭曾國藩調派劉連捷等軍赴楚助剿疊據奏報業經陸續到皖劉連捷一軍已由官文檄調赴鄂此起官兵皆係曾國藩舊部卽鄂省水陸各營亦係楚勇居多若得曾國藩前往調度則兵將相習必可收指臂之效見在江甯已臻底定軍務業經旅事卽著曾國藩酌帶所部前赴皖鄂交界督兵剿賊務卽迅速前進毋稍延緩第恐曾國藩之兵由東路進偏賊必避兵西竄武漢一帶防守亦關緊要官文俟曾國藩到後卽可回駐省垣會同吳昌壽妥籌防範並將各營餉需源源接濟毋令缺乏僧格林沁見駐黃岡之上巴河第恐深入楚境難保賊匪不伺隙竄擾北路著酌量情形扼要駐紮力顧豫疆賊或北竄卽著督率馬步迎頭夾擊以期聚而殲旃僧格林沁官文曾國藩均係威望素著似此三面扼紮必能將此股賊匪悉數殲除剋期蕲事至江南甫經

肅清所有撫輯地方一切事宜均須妥爲籌辦卽著李鴻章前赴江甯暫署總督篆務曾國藩俟李鴻章到後卽行交代起程江蘇巡撫著吳棠暫行署理並著迅速起程赴蘇將地方應辦事件認真籌辦富明阿著兼署漕運總督所有淮徐一帶防守事宜卽著妥籌兼顧應否移紮清淮並著富明阿斟酌情形奏明請旨至李鴻章籍隸安徽該省係總督兼轄固應回避惟此時軍情緊要不龍不權宜變通李鴻章著毋庸奏請回避卽行前往江甯接替以便曾國藩迅速出省曾國藩李鴻章皆係朝廷有功之臣素能不芬畛域此時雖係暫時任事於應勦應防一切機宜均當以大局爲重力戒滿盈不可稍涉大意以副委任穆圖善一軍本日已諭令出關勦賊甘肅兵力不敷調撥楊岳斌前已奏明回籍募勇赴甘著卽趕緊選募成軍剋日起程毋稍遲誤溫德勒克西等及蘇

倫保等馬步各隊前經官文奏請暫畱楚省見在西路需兵孔亟
仍著官文會國藩飭令迅赴穆圖善軍營不得藉詞奏畱甘省軍
情萬緊四川係屬鄰疆派兵赴援較爲迅速著駱秉章無論如何
總須抽調一軍派員統帶前往聽候都興阿調遣毋許再有推諉
將此由六百里各諭令知之○回匪陷烏魯木齊滿城都統平瑞
死之以保恆署烏魯木齊都統飭穆圖善率師出關剿賊諭山西
籌濟軍需○丁丑 慈禧皇太后聖壽節 御慈寧宮 上率王
以下文武官員行慶賀禮○戊寅沈葆楨奏逆匪自甯都敗後回
踞瑞金鮑超率師連日追剿擒斬極多九月十五日馳抵瑞金該
逆前股入城死守後股背城而陣經鮑超督軍擊敗城賊驚惶開
西南門而遁當將縣城克復城外賊壘一律踏平追至距城三十
餘里之莖田直達閩界始行收隊計擒斬長髮五六千人乞降解

散者不計其數餘賊由武平山路潛遁該署提督已知會閩省防軍一體截剿臣仍飭各屬加意嚴防以杜回竄查鮑超統師入江冒暑血戰不許灣七十餘壘攻克金溪瀘溪南豐新城力解甯都重圍削平瑞金踞逆東南大局深資保障應如何優加恩獎伏候聖裁其所部將領員弁兵勇可否飭下曾國藩破格請獎出自天恩又奏據席寶田稟稱九月十三日在高田擒獲偽尊王劉慶漢訊供後凌遲處死以幼逆尙無蹤迹移軍石城派知縣謝蘭階訓導唐家桐分帶小隊會同石城縣知縣曾繼勳四出搜捕二十五日遊擊周家良獲之荒谷並獲李秀城次子李其詳請解省確訊等情竊念洪福瑱黃口小兒無足介意惟洪秀泉竊號十餘年流毒十餘省遺孽猶在則神姦巨慝倚其名號足以揮召羣兇李侍賢汪海洋等股東西奔竄方欲得幼逆以冀死灰復燃當幼

逆遁至廣昌去濂逆已聞不容髮幸席寶田晝夜窮剿追至石城
鮑超援甯都克瑞金使濂逆無可容足而幼逆展轉荒谷卒就生
擒東南大局從此底定所有尤爲出力之按察使席寶田應如何
優加恩獎出自 聖裁遊擊周家良等先行開列懇恩獎勵其餘
出力員弁勇丁可否容 臣擇尤請獎出自逾格 鴻施洪幅瑱應
否檻送京師李其詳年僅四歲應否飭令解省監禁俟及歲時照
例辦理均請旨遵行 上諭內閣沈葆楨奏官軍追剿敗匪生擒
首逆一摺幼逆洪幅瑱一犯雖係洪秀泉之子而么麼小醜漏網
餘生亦不值檻送京師著沈葆楨即將洪幅瑱在江西省城凌遲
處死以快人心沈葆楨自簡任江西巡撫籌防籌剿深合機宜浙
皖賊匪屢次竄入江西均經調派兵勇次第掃蕩並生擒首逆殲
除各巨酋實屬勤勞懋著加恩著賞給一等輕車都尉世職並賞

給頭品頂帶署浙江提督鮑超前在江楚皖三省勦賊卓著戰功
此次督軍入江所向大捷疊摧巨股連克堅城賊眾聞風膽落遂
能盡掃逆氛膚功立奏加恩錫封一等子爵以示優異記名按察
使席寶田帶兵追賊疊獲勝仗並將首逆捕滅奮勇可嘉加恩著
賞給雲騎尉世職並賞穿黃馬褂○諭閩浙總督兼署浙江巡撫
左宗棠督師入浙恢復浙東各郡縣進規浙西攻克杭州省城及
湖州等府縣肅清全浙並派兵截剿皖南竄賊蕩平巨股卓著勳
猷茲當幼逆洪幅瑱就擒殲除餘孽東南軍務漸次底定自應渥
加懋賞左宗棠著加恩錫封一等伯爵浙江布政使蔣益澧隨同
左宗棠統兵入浙身先士卒所向無前先後立拔堅城廓清浙境
懋著戰功並著加恩賞給騎都尉世職以示渥沛恩綸至意○諭
議政王軍機大臣等僧格林沁官文奏蘄水髮捻被勦窮蹙分竄

廣濟太湖督率水陸各營分路防剿一摺逆眾自趨蘄水後大股
麇聚梅子山等處與蔡家河踞匪互爲犄角經僧格林沁官文分
督水陸各軍扼要防剿連獲勝仗成大吉一軍復與蔣凝學援師
奮勇力戰立解重圍又累捷於關口等處逆匪分股敗竄一竄太
湖彌陀寺一竄廣濟自應乘勝會剿以期聚而殲旃卽著僧格林
沁督飭成大吉等馬步各軍跟蹤追擊至劉連捷等軍已抵太湖
並著僧格林沁曾國藩飭令迎頭會剿迅奏膚功第逆匪既經陸
軍剿擊下游又有皖軍攔截當此秋深水涸沿江沿湖各要隘尤
應嚴密堵禦以防搶渡官文務當督率水師梭巡防範遇賊卽擊
毋得稍有疏虞英山一路防守尙屬空虛著僧格林沁酌撥數營
嚴防回竄見在東南軍務漸次底定楚皖交界之賊尤應及時撲
滅曾國藩著仍遵前旨迅赴皖鄂一帶督兵會剿俾此股殘匪早

就殄除以副委任將此由六百里各諭令知之○諭徐宗幹奏官軍擊退瑞金竄匪逆偏漳郡並請飭浙營得力將官來閩林文察奏由省啟行馳赴邵汀一帶等摺片瑞金踞賊經官軍擊走後繞竄廣東平遠鎮平大埔等處闖入閩境窺伺龍巖直犯漳郡見在漳郡失守與否尙無確信賊勢既趨重閩疆漳屬南靖等縣復有土匪串同粵勇假冒髮逆各處滋擾見在關鎮國畱守汀州要隘康國器駐防光邵徐宗幹已飭郭什春帶兵勇二千馳往泉州並調魏喻義張運蘭作速進剿卽著督飭各軍乘新竄之賊喘息未定一鼓殲除毋任延蔓閩省兵力較單全浙見已肅清左宗棠檄飭得勝之軍統帶勁旅星馳赴閩迅殄賊氛該督職任兼圻責無旁貸務須實力區畫以維全局林文察已赴邵汀一帶卽著探明賊蹤相機進剿毋稍遲緩本日據沈葆楨奏鮑超一軍攻克瑞金

縣城追賊至距城三十餘里之莖田直達閩界等語仍著鮑超乘破竹之勢督軍出境會同閩省防軍將此股敗匪追捕淨盡以竟全功前據毛鴻賓等奏賊由江西竄入平遠縣城南雄解圍後賊由江西龍南竄入和平龍川縣境橫竄嘉應州界見在粵省之賊由大埔竄入閩境其嘉應等處賊勢如何平遠縣城是否收復前調之王文瑞趙煥聯兩軍著毛鴻賓郭嵩燾飛咨江西湖南分飭該員等迅速入粵助剿並飭李福泰等將各處竄匪節節掃蕩以期底定東南全局將此由六百里諭知左宗棠毛鴻賓沈葆楨徐宗幹郭嵩燾並傳諭林文察知之○諭保恆奏迪化失守阜康縣被賊焚燒見籌防堵麟興等奏蒙古官兵餉缺情形各摺片見在賊匪悉竄迪化阜康一帶勢將逐漸東趨亟應嚴密堵遏保恆見經署理烏魯木齊都統所有各城防剿事宜卽著妥爲籌辦協領

功訥有等所帶滿漢兵勇不足千人兵力實形單薄著再添募勇丁扼紮濟木薩一帶力遏東竄之路科布多所派蒙兵業經到古卽著妥爲調遣喀爾喀西兩部兵一千五百名據麟興等奏稱未經戰陣口糧亦苦不足恐難得力著嚴飭委員遇春妥爲駕馭迅速前進所需糧餉卽著將晉省解到銀兩先行發給毋令枵腹荷戈巴里坤哈密等處近日防守情形著保恆隨時查明具奏並著行知文祺侯扎克當阿接任署事後卽行前赴古城一帶督兵進剿毋稍遷延前經諭令穆圖善統率全部出關剿賊此時新疆北路逆敵漸張若得內地之兵星速赴援則壁壘一新自不至蔓延爲患穆圖善當懷遵前旨卽行部署起程取道出關相機進剿不得稍有遲誤所需餉項並著飛咨山西巡撫趕緊撥解以利進行烏什幫辦大臣伊昌阿前在都興阿軍營業經諭令赴任著穆圖

善咨會都興阿催令迅速起程毋稍延緩將此由六百里各諭令知之○以江西官軍生擒首逆洪幅瑱賞遊擊周家夏巴圖魯名號雲騎尉世職以副將儘先補用餘加銜升敘有差○予烏魯木齊合門殉難都統平瑞祭葬世職加等入祀京師昭忠祠諡忠壯道員伊昌阿祭葬世職眷屬人等分別旌卹如例革署知州孔昭恆職並逮問○予湖北陣亡副將楊秀琪祭葬世職○庚辰左宗棠奏逆賊李侍賢汪海洋兩股疊據江西官軍剿敗然黨夥甚眾時出江粵邊界昨接福建撫臣徐宗幹函稱瑞金踞匪擊退後賊之入粵者復由大埔翻山竄犯汀屬陷武平縣城張運蘭轉戰失利賊即分股竄陷龍巖南靖並陷漳州府城徐宗幹見調林文察回扼泉州臣查漳州龍巖失陷汀州所屬亦徧地賊氛北與延平永春毗連南與廣東潮嘉接壤見在江西瑞金會昌尚有賊踞關

鎮國駐汀州康國器駐邵武兩軍均難撤動徐宗幹調泉廈各處官兵六七千人分防興泉並通永春等處兵單力薄殊爲可虞臣飛飭提督黃少春副將劉明珍兩軍由衢州取道浦城赴邵武一帶接防以便騰出康國器全部進剿漳州並飭援江各軍除王德榜王開琳仍畱吉安防剿外劉典一軍卽由建昌取道赴汀惟此兩路由江浙邊界赴閩山徑崎嶇深恐緩不濟急見在賊踞漳州有下趨之勢省垣爲根本重地興泉兩郡爲省城門戶不可稍涉疏虞當飭提督高連陞率所部馳赴甯波雇坐輪船由海道先赴福建省城察賊所向相機迎剿以期穩固臣俟各軍拔行後卽擬進駐衢州就近調度如局勢必須急進當赴閩親督諸軍迅速剿辦惟浙省係臣兼署一切善後事宜猶須次第經理臣旣赴閩勢難兼顧應請飭下新任撫臣馬新貽速赴本任接辦以重職守馬

新貽未到任以前臣如出省所有浙江巡撫篆務可否卽交藩司
蔣益澧護理伏候訓示遵行又奏接據署福建莆田縣知縣吳光
漢稟報漳州府城被匪闖入焚掠九月十五日仍退往龍巖臣惟
漳州賊退尙屬得自傳聞而龍巖與粵東毗連各處均爲賊踞閩
省軍情仍屬喫緊所有三路入閩官兵應仍星馳前進俾速戡定
上諭議政王軍機大臣等江西逆眾由廣東大埔翻山竄犯汀
屬武平縣境張運蘭轉戰失利賊分股陷龍巖州南靖縣入漳州
府城徐宗幹調林文察回扼泉州左宗棠飭提督黃少春副將劉
明珍由衢州取道浦城赴邵武一帶接防以便替出康國器全部
進剿漳州劉典一軍由建昌赴汀該督恐緩不濟急已飭高連陞
由海道赴福州省城相機迎剿並擬進駐衢州就近調度催新任
巡撫馬新貽赴任所籌均尙周妥本日已諭令馬新貽卽赴浙省

矣浙省接辦善後各事亦關緊要萬一閩省軍情更緊馬新貽一時未能赴浙卽令蔣益澧暫行護理仍隨時兼顧以期無誤漳州踞匪是否退往龍巖各該府州縣等城文武如何下落均著左宗棠徐宗幹查明具奏龍巖與粵東毗連各處俱爲賊踞閩省軍情萬分喫緊著左宗棠催令派出各軍並親提官軍速籌進剿張運蘭一軍雖小有挫失左宗棠徐宗幹仍當督飭該臬司激勵將弁以期再整軍威閩省被賊闖入連陷數城徐宗幹何以先事毫無準備如再有疏失自問當得何罪毛鴻賓沈葆楨等於賊匪竄出境外何以不令諸將跟追畛域分明以鄰爲壑殊非同心禦侮之道著卽飭令在事員弁出境窮追會同閩浙諸軍協力剿洗淨絕根株其瑞金等處踞匪及南雄一帶竄匪仍著各該督撫認真接捕毋畱餘孽將此由六百里各諭令知之○諭左宗棠奏賊匪繞

竄閩疆暨賊陷漳州各摺片逆賊李侍賢等股由廣東大埔翻山
竄入閩境撲陷武平縣城張運蘭進剿失利賊卽分股竄陷龍巖
南靖並句結內應攻陷漳州府城汀州所屬徧地賊氛左宗棠見
調援江之劉典一軍八千人由建昌取道赴閩計已起程前進惟
江西瑞金會昌一帶尙有賊踞見在僅畱王德榜王開琳兩軍在
吉安等處防剿兵力恐不敷分布且虞竄閩之賊被閩浙粵東諸
軍兜剿窮蹙難保不回竄江境著曾國藩飛飭鮑超一軍乘勝越
境會剿務將入閩賊匪就地殲除毋得稍存畛域之見貽誤戎機
左宗棠因閩省賊蹤紛擾陷漳州之賊見雖退往龍巖而汀屬匪
勢延蔓擬親赴衢州調度暫令蔣益澧護理浙江巡撫前因曾國
藩已赴江甯諭令馬新貽仍畱安慶辦理善後事宜此時左宗棠
移紮衢州恐須親督諸軍入閩剿賊馬新貽身膺浙撫責無旁貸

著卽將安慶應辦善後各務與曾國藩等會商揀派大員接辦卽由曾國藩迅速飭赴安慶以便馬新貽交替起程劉典一軍調赴閩省皖南防剿事宜並著曾國藩喬松年妥籌會辦江西瑞金會昌踞匪並由曾國藩會商沈葆楨督飭諸軍迅卽殲除毋任復行旁竄將此由六百里各諭令知之○諭張集馨奏馳抵涇州偵察賊情一摺逆回自叛陷固原後麇集涇平交界之新城地方欲斷平涼各營糧道又有馬步賊萬餘在涇州之北原肆擾首逆孫義寶欲將老弱送回白集原糾眾回竄長安見經畱防平涼之總兵周顯承等在黨原各隘連戰皆捷餘賊遁回新城小峴子一帶盤踞涇平兩處計可無虞糧道尙不至阻塞惟該逆盤踞北原必須力籌扼剿以免旁逸著都興阿雷正綰飭令畱防平涇各營務將此起竄賊就地殲除杜其竄陝之路曹克忠已抵蓮花城見與雷

正綰陶茂林三路進攻著該署提督督率諸軍迅圖攻拔以便次第規復固原兼顧平涇等處至逆匪既有竄回陝西省城與城中回民勾結內應之語尤不可不嚴爲之防著劉蓉將城守事宜不動聲色嚴密稽查並派兵於邠州白集原等處實力防範儻有疏虞任賊闖入惟劉蓉是問蘭州道路無徑可繞張集馨擬將辦撫不實之楊柄銓一案辦結後道路疏通再行赴省著該臬司趕將此案查訊明確卽行前赴蘭州會籌防剿毋誤事機蔡啟二逆自竄陷甘肅階州後劉蓉所派追剿之蕭慶高等軍見在剿辦情形若何何以久未據該撫馳奏著飭令該員等會同隴蜀各軍實力剿洗並將見在賊情迅速奏聞將此由六百里諭知都興阿雷正綰劉蓉並傳諭張集馨知之○辛巳安徽巡撫喬松年奏楚賊復竄皖境見飭各軍分投堵剿得旨著卽督飭諸軍遇賊卽擊均歸

僧格林沁節制仍隨時與曾國藩會商妥辦皖北各路防務不准稍涉疏懈○睿親王仁壽薨賞銀一千兩治喪予祭葬諡曰僖○壬午諭議政王軍機大臣等李鴻章奏請將措解楊岳斌募勇銀兩劃抵撥款一摺前因陶茂林剿匪喫緊諭令李鴻章籌撥江海關銀五萬兩嗣因楊岳斌募勇赴甘需費甚急復諭李鴻章迅速籌撥銀十萬兩茲據李鴻章奏稱江海關稅款入不敷出僅湊撥銀三萬兩解交楊岳斌募勇赴甘卽抵作飭撥甘省之款等語甘省軍情萬緊涇平一帶回氛日熾陶茂林隨同雷正綰攻取蓮花城亟須鼓勇前進非厚儲餉精不足集事江省雖餉項支絀仍應通盤籌畫力顧大局所有前撥之江海關銀五萬兩著李鴻章仍遵前旨迅速如數撥解見在由陝抵甘道路尙可探明前進不至梗阻並著嚴飭委員趨程解往不得藉口稽延致誤事機至楊岳

斌募勇之費雖經李鴻章撥銀三萬兩亦斷不能敷用且指撥各省內亦尙有力難兼顧甚於江蘇者設皆紛紛解不足數西北大局安望其能有起色耶仍著李鴻章如數協濟俾楊岳斌趕募成軍星馳西行以後尙須源源接濟以顧邊陲而全大局將此由五百里諭令知之○癸未沈葆楨奏據席寶田將僞干王洪仁玕僞卹王洪仁政僞招王黃汶英派員解省臣親提隔別研鞫均各供認不諱洪仁政蠢然一物於賊中情形不甚了了黃汶英貌甚英鷲質之干逆卹逆均稱確係其人當時浙中及廣豐誤報陣斃者實緣得其僞印之故其言洪逆內政昏亂各省擁兵自衛情形甚悉洪仁玕羣兇渠魁洪逆謀叛實伊慫恿已未以後僞政歸其掌握流毒江浙幾無孑遺所有該逆等應如何辦理之處請旨遵行

上諭內閣沈葆楨奏拏獲兇悍逆首請旨辦理一摺本年自江

甯湖州克復後漏網悍逆洪芒玠洪芒政黃汶英等窮蹙奔竄擾及江皖疊經官軍跟蹤追捕茲由席寶田等軍將該逆等擒獲後訊取供詞洪芒玠尤爲羣兇渠魁十數年來流毒江浙等省生靈塗炭實堪痛恨著沈葆楨卽將洪芒玠洪芒政黃汶英三犯就地凌遲處死以快人心○諭議政王軍機大臣等沈葆楨奏閩省軍情萬緊請飭左宗棠入閩督辦一摺據稱粵逆回竄汀郡張運蘭失利賊陷武平瑞金踞逆盡數下竄粵之大埔嘉應閩之永定龍巖漳州先後失守見在咨商鮑超劉興相機赴援徐宗幹擬出省調度而省防又慮空虛若坐鎮省垣則前敵諸軍無所統攝請飭左宗棠剋日入閩等語前據左宗棠奏賊匪繞竄閩境已飭黃少春劉明珍由衢州赴邵武劉興由建昌赴汀高連陞山海道赴福州該督進駐衢州相機調度當經諭令曾國藩飭鮑超越境會剿

刻下閩省賊氛甚熾著左宗棠催令派出各軍迅速起程赴閩剿賊該督行抵衢州就近體察軍情如果十分緊急卽行移軍直入閩境相機督剿迅掃逆氛江省主客各軍共計七萬有餘續又添募勇丁爲數不少此時瑞金踞匪已全數下竄軍務較鬆正可騰出兵力赴閩會剿沈葆楨旣桑梓關情想斷不能坐視著酌度情形何處兵勇可以抽撥卽派令得力員弁統帶赴閩鮑超一軍該撫亦可就近咨催入閩毋得稍分畛域所有援閩各軍均歸左宗棠調遣以一事權江省防務仍著沈葆楨妥籌兼顧將此由六百里各諭令知之○甲申諭議政王軍機大臣等道員金國琛在安徽帶兵得力本日已簡放甘肅鞏秦階道見在階州失守該省需員辦理軍務著曾國藩卽飭金國琛酌帶所部迅速赴任以資得力前經諭令曾國藩駐楚皖交界督師剿賊該大臣接奉前旨諒

已部署起程嗣據喬松年奏蘄水等處之賊回竄霍山太湖等境
僧格林沁已至英山誠恐賊眾逐漸深入皖南北防不勝防必須
就地殄除方可一勞永逸李鴻章見已至江甯辦監臨事務即可
就近照料一切以便曾國藩督師出省前因左宗棠須赴衢州辦
理閩省軍務曾經諭令馬新貽迅赴浙江省城是安慶省垣尤須
大員駐紮應派何員前往接替之處並著迅速具奏本日據御史
胡慶源奏江南鄉試人眾雲集請飭稽察奸宄等語金陵開科士
商雲集誠恐良莠不齊奸宄潛迹著曾國藩李鴻章督飭文武各
員加意防範不可稍有疏虞將此由五百里各諭令知之○諭恩
麟奏回匪分擾東北各州縣渭源失守見籌防剿情形一摺盛固
陝回句結義岡川踞匪分竄靖通安會靜甯等處於九月初三至
十四等日直撲靖遠縣城圍攻甚緊十六日渭源被陷靖遠爲省

城糧運要路且通河西三郡見在城圍未解亟應籌撥勁旅實力
進剿以保危城著恩麟督飭派出之王德恆等軍重整隊伍出城
迎剿一面酌派兵勇前往援救以解該縣之圍東路州縣風鶴時
驚河州剿辦仍未得手誠恐該匪漸偏漸近窺伺省城著雷正綰
於陶茂林曹克忠所部內酌撥數營馳赴蘭州省城以備調遣該
署提督惟當趕緊抽撥催趙前進力保省垣重地兼顧河西三郡
毋稍延緩致誤戎機恩麟仍當就見有兵力將各路防剿事宜妥
爲調度並督飭在省文武嚴密巡防固封守儻蘭州省垣稍有
疏虞必治恩麟以應得之罪都興阿督辦甘肅軍務責無旁貸應
如何統籌兼顧並分兵進剿以牽賊勢之處卽著該將軍酌度情
形相機辦理將此由六百里諭知都興阿雷正綰並傳諭恩麟知
之○諭恩麟奏哈密漢回變亂官兵會同郡王伯錫爾夾擊獲勝

全行殲滅一摺哈密回逆於本年八月間乘夜縱火焚燒闕鄉勢甚披猖經文祺派兵約會郡王伯錫爾統帶該處兵丁夾剿大獲勝仗立將該匪全行殲滅辦理甚爲妥速本日已明降諭旨將伯錫爾嘉獎並交理藩院從優議敘矣該城逆回聞風煽亂前據保恆奏報匪勢鴟張闕鄉等處俱被焚掠此次郡王伯錫爾督帶回兵會同官軍兜剿能否殲除淨盡抑尚有零股被剿竄匿著文祺扎克當阿督飭存城兵勇會同伯錫爾所帶回兵實力接剿務期盡絕根株毋畱遺孽前因扎克當阿已行抵巴里坤諭令馳赴哈密署理辦事大臣印務計已趨程前進文祺俟扎克當阿到城後卽將應辦防剿事宜移交該大臣與郡王伯錫爾妥籌會辦文祺卽可馳赴軍營迅籌剿辦並由保恆飛催惠慶迅赴古城統帶蒙古援兵星速前進規復烏垣本日據兵部遞回八月十四二十一

兩日由軍機寄交平瑞印封二件內諭旨二道均係軍情緊要之件保恆因烏垣被陷輒卽遞回殊屬不知緩急嗣後遇有此等緊要寄諭之件卽著保恆收存折閱遵旨籌辦毋得稍涉推諉致誤事機至八月二十一日寄諭係因庫倫辦事大臣文盛等酌派東兩盟官兵遴選得力之扎薩克公等管帶馳赴烏垣助剿諭令平瑞派員迎提等情此項官兵見在行抵何處並著保恆派員迎提催令趨程前進以厚兵力將此由六百里各諭令知之○以林之望爲甘肅按察使由鞏秦階道遷○前任陝甘總督熙麟卒予祭葬諡忠勤○予浙江殉難翰林院庶吉士胥瑞琰等祭葬世職○丙戌諭議政王軍機大臣等曾國藩奏提督鮑超遵奉前旨請假葬親一招已明降諭旨賞假兩箇月回籍經理葬事矣鮑超轉戰數省所向有功本年自署西征累獲大捷肅清江西全境厥功尤偉前已

加恩賞戴雙眼花翎旋復錫封子爵此次又准其回籍葬親所以
獎其勤勞而遂其孝思者想鮑超必知愈加感奮見在甘肅軍務
未竣新疆回氛日益蔓延前已命穆圖善帶兵出關剿賊而兵力
尙單非得勇略出羣如鮑超者前往協力恐難壁壘一新著曾國
藩傳旨鮑超令其俟假期一滿卽行由川起程出關剿辦回匪其
舊部兵勇及得力將弁並准其酌量奏調隨帶同行川勇向稱趨
捷並著該提督挑募成軍妥立營規帶赴關外以厚兵力從前回
疆用兵楊遇春卽係川省土著立功邊域彪炳旂常鮑超務當督
率諸軍肅清西陲威揚萬里以與前賢後先輝映該提督忠勇性
成接有此旨必卽欽奉遵行以副朝廷委任閩省軍務萬分喫緊
前曾諭令沈葆楨催令鮑超赴閩援剿此時鮑超既經賞假回川
其所部如總兵宋國永婁雲慶等皆係勇敢素著卽著分領鮑超

之軍左宗棠沈葆楨徐宗幹檄令赴閩會合夾擊痛掃逆氛援閩各軍並著仍遵前旨統由左宗棠節制調遣以一事權將此由六百里諭知曾國藩左宗棠沈葆楨徐宗幹並傳諭鮑超知之○諭穆圖善奏統兵陸續抵甘請催山陝兩省軍火餉銀並行糧原款卽在陝西補解欠餉內扣還歸款各摺片穆圖善所部黃金山等四營金順兩起馬隊先後馳抵花馬池地方並督率孟宗福等剋期前進所陳餉糈艱窘情形朝廷早經鑒及前因新疆回氛甚熾諭令穆圖善出關剿賊或繞赴蘭州或北走草地均由該將軍探明前進著仍遵前旨統軍出關暫駐哈密籌畫進兵之策穆圖善旣不克在甘剿賊著都興阿就見有兵力妥籌防剿前次請調吉林兵一千名赴甘助剿本日據景綸等奏存兵無多無可徵調已允所請俟湖北軍務告竣僧格林沁馬隊尙可酌撥數千屆時卽

當撥交該將軍統帶以資調遣穆圖善所需餉項十分緊急前諭沈桂芬先撥銀二三十萬兩迅解穆圖善軍營俾利遄征該營糧臺見無絲毫存款各軍士嗷嗷待哺幾有不可終日之勢著沈桂芬將指撥之款迅速籌解一面趕緊覆奏毋得稍延劉蓉相距較近尤應力籌接濟乃疊次奉諭嚴催竟敢延不報解任意宕延實屬不知緩急著劉蓉懍遵疊次諭旨將欠解之餉按數如期籌解並將軍火帳棚等項按次委解以供要需並著穆圖善派員迎提以期妥速儘劉蓉仍前延玩致穆圖善停兵待餉不克前進必重治該撫以應得之罪穆圖善所部兵勇陝省欠餉七八月之多此次沿途所發麪楚等項著劉蓉卽在補解欠餉內扣還歸款嗣後該將軍行糧仍著劉蓉陸續協濟將此由五百里各諭令知之○予江蘇殉難訓導梅振鏞安徽殉難通判達凌阿等祭葬世職○

丁亥僧格林沁官文奏自我軍敗賊於新洲集該逆東趨風火山等處盤踞臣僧格林沁於九月二十日督馬隊進紮竹瓦店常新

阿藍斯明等移紮朱店成保陳國瑞等進紮團陂二十二日分西

北兩路進剿獲勝奪賊壘多處該逆麕集包龍廟列仗回拒翼長

恆齡等各率馬隊由中路進攻該逆翻山向蘄水一帶潰竄是日

斃賊數百名解散無數二十三日臣官文到竹瓦店晤商機宜以

賊蹤奔竄靡定江防固須嚴密仍當遏截西北以防越嶺回竄臣

官文卽日回營督飭水師慎防江面臣僧格林沁次日督隊進紮

新店地方兼催各路步隊進剿探得該逆分股一竄蘄州之曹家

河一竄蘄水以東之陳家壩將趨皖境遂飛咨撫臣喬松年嚴飭

官軍實力扼截前後夾擊一面令常新阿等追剿曹家河竄匪臣

僧格林沁督帶恆齡成保等馬步各隊跟追東竄之賊二十六日

至陳家壩探報賊蹤漸趨東北當札飭英翰郭寶昌等各帶所部於英山扼要堵剿成大吉等管帶所部跟蹤尾追二十七日成大吉等敗賊於青石嶺等處該逆翻山分竄一向東北潛太一路一向正北英山一路遂飭成大吉等追剿東北竄匪臣僧格林沁督帶成保陳國瑞等馬步各隊繞赴英山分東西兩路橫出堵剿北竄之賊十月初二三等日成保等在英山以東追殺賊匪數百名解散不少初四日追至上漠河四路悍賊齊來撲犯經我軍擊敗殲斃八九百名生擒數百名初五日探得賊勢將趨霍山恐其西竄則流波磴一帶正當其衝總兵張得勝之軍未免單薄遂飭駐古佛堂之何紹彩等拔隊迅赴流波磴會同張得勝實力堵剿並催英翰郭寶昌各帶步隊向霍山一路速進橫截臣僧格林沁督帶恆齡等馬隊隨後繼進初六日英翰郭寶昌追至樂兒嶺擒斬

甚多先是英翰等敗賊於陶家河等處有匪目黃中庸率眾千人來降初七日我軍至黑石渡英翰等令黃中庸襲取賊營而陳得才馬融和邱元才等股漫山徧野直撲我軍英翰等督隊迎擊擒斬數百名將賊截爲兩段臣僧格林沁亦督帶馬隊趕到賊勢窮蹙邱元才率黨向正北麻埠奔竄僞將溫其玉等及夥黨九千餘人投械乞降因人數過眾須妥爲安插速解其勢當飭英翰等酌畱二三千人令爲前敵立功贖罪其餘酌給川資遣散回籍偵知逆首陳得才馬融和等俱在管家渡一帶麇聚僞端王藍城春在五歧河一帶盤旋當飭成保英翰等各帶所部分投進剿初九日馬融和率黨七萬餘人來營投誠願爲前敵初十日僞將甘懷德等亦誘擒僞端王藍城春出獻率黨五千餘人投誠當將藍城春訊明凌遲梟示以申國法而快人心曉諭降眾痛改前非遣散回

籍馬融和緩死畱營令誘擒逆首陳得才並招撫逆黨以孤其勢
仍隨時察看該降目如尙懷異志卽按軍法從事聞陳得才伏匿
英霍潛太一帶已飛咨喬松年飭各處防兵一體搜拏至何紹彩
張得勝等由流波碰追賊至桑樹衝擒斬多名該逆前股已過麻
埠北竄後股賊酋汪侍第率眾數千投誠薙髮遣散並據張得勝
稟報追剿至商城東北僞將邱元才率眾乞降當飭該總兵等確
查如果真心悔罪准予投誠又據蔣凝學稟報賊至英山屬之長
嶺庵地方僞將吳青泉等率黨萬餘投誠當經札飭該道畱千餘
名驅之前敵其餘遣散見在大夥陸續來降者不一而足統計各
營接仗擒斬數千受降十數萬人前後遣散降眾已分咨湖廣安
徽河南陝西各督撫嚴飭沿途地方官分起遞解原籍妥爲安插
毋使滋事臣 僧格林沁統兵在黑石渡暫紮以資鎮撫俟稍有端

緒再行的量緩急撥兵助剿惟常新阿等於九月杪追賊至廣濟
東南遇伏失挫蕭河清力戰陣亡官兵亦多陣歿臣僧格林沁飛
咨官文確查接應不力各員據實參辦見在該逆上竄蔡家河一
帶意圖回擾黃麻難保不北犯豫疆已飛飭常新阿等整隊繞出
賊前堵截並撥成大吉之軍由英山折回楚省會剿毋令西趨豫
省兵力單薄先令成保陳國瑞等帶領馬步隊取道商城向光州
一帶扼紮並函會國瑞選帶馬隊駐紮光州以杜北竄已革提督
馬德昭業經到營見札令幫同成保管帶步隊認真追剿 上諭
議政王軍機大臣等僧格林沁官文奏追剿髮捻各匪獲勝匪首
窮蹙乞降陸續來歸者不下十萬餘眾該親王聲威所及巨憝授
首匪眾傾心蓋緣公忠素著用能數日之間獲此奇捷覽奏深爲
嘉悅馬融和亦係著名悍寇雖暫時帖耳受撫狼子野心終難馴

制且降衆人數過多恐首鼠兩端之輩不免久而生心著僧格林沁暫駐黑石渡妥爲鎮撫以防反側其有籍可歸者自應妥爲安置俾安生業沿途經過各地方尤須認真彈壓方不至滋生事端著官文吳昌壽喬松年張之萬嚴飭所屬地方妥籌辦理陳得才張總愚陳大濬三犯尚在逃未獲著僧格林沁督飭各軍實力拏並著飭令馬融和設法誘擒陳得才等以明心迹該三犯見在賒伏英霍潛太一帶著喬松年嚴飭在防諸軍一體兜剿儻堵遏不力任令脫逃查由何路竄走卽惟何路防兵是問常新阿等追剿南竄股匪至廣濟縣著該親王會同官文查明參辦見在此股若干人著僧格林沁查明具奏逆衆旣圖上竄回擾黃麻難保不北犯豫疆該親王已令成保陳國瑞向光州一帶扼紮以杜北竄並著國瑞選帶馬隊馳往光州會同張之萬督飭防軍奮力扼剿

馬德昭見已到營卽著札令幫同成保管帶步隊以資差遣將此
由六百里各諭令知之○諭本日據僧格林沁等奏官軍剿賊疊
獲大勝各股匪眾窮蹙乞降見擬陸續遣散遞籍已分咨湖廣等
省督撫妥爲安插等語此等降眾大半被賊裹脅居多見旣投誠
反正自應分別遣散惟其中良莠不齊若不妥籌安置難保不別
滋事端著惲世臨於該降眾等遣回過境時飭令所屬地方官酌
給口糧分別遞回原籍妥爲安插認真約束毋稍大意將此諭令
知之○諭雷正綰奏官軍攻克蓮花城老巢見擬分路剿辦並曹
克忠助剿得力請飭陝西接濟軍餉及圖繪攻取要隘呈覽各摺
片雷正綰自平涼移師而南疊破逆巢殲除悍黨此次復督率曹
克忠等攻克著名老巢洵屬調度有方勇略出眾不負朝廷倚任
之隆深堪嘉尙前因靖遠被圍渭源失守省城防務喫緊曾經諭

令雷正綰於陶茂林曹克忠所部內酌撥數營馳赴蘭州以備調遣雷正綰見於攻拔蓮花城後卽令陶茂林督率馬步十七營剋日徑赴蘭州妥籌堵剿所辦與前旨適相脗合卽著馳赴蘭州省城所有趙必達一軍及省城一帶各營防剿兵勇悉歸陶茂林調遣卽將西路一應防剿事宜相機妥辦迅解河州之圍以冀漸次戡定嗣後軍情事件卽由陶茂林與恩麟聯銜具奏俾免稽延蓮花城爲四達之衢且地屬秦安與階州接壤見在髮逆竄擾階州逆蹤環徧尤不可不加意防範曹克忠紀律嚴肅所部各營一律精銳卽著飭令暫紮蓮花城居中控制其張華之軍卽撥歸曹克忠調遣以便進攻秦州鹽關等處回匪迅速掃蕩雷正綰見已回軍平涼卽著審度軍勢恢復固原節節北趨期與都興阿合兵夾擊肅清甯靈一路賊匪底定邊陲所陳要隘圖說具悉一切以後

雷正綰進兵道路仍著將地勢賊巢隨時繪圖貼說呈覽曹克忠一軍所需糧餉向由陝省供支此時雖已入甘助剿而甘省餉項支絀難期接濟仍著劉蓉照舊供支源源運解不得稍分畛域致誤戎機秦州捐款釐金業由恩麟撥充雷正綰兵餉陝餉未到以前卽著將此項歸併曹克忠軍營應用以濟然眉髮逆竄往階州劉蓉所派追賊之蕭慶高何勝必兩軍見在行抵何處一切剿辦情形總未見劉蓉詳細具奏實不可解著卽恪遵前旨迅速覆奏毋得視同隔膜置軍事於不問自取罪戾本日據僧格林沁等奏剿辦楚皖賊匪疊獲大勝除斬殺外各股匪首窮蹙乞降者甚眾已陸續遣散回籍等語此股降眾多有籍隸陝西者著劉蓉嚴飭各地方官妥爲安插毋令滋事致干重咎將此由六百里諭知都興阿雷正綰劉蓉並傳諭陶茂林恩麟知之○予陣亡副將陳有

傳等祭葬世職建祠○戊子諭議政王軍機大臣等僧格林沁等奏陸路賊匪由廣濟上竄督師追剿一摺逆匪分股一由張家塋陳德園潰走一由蘄州廣濟奔逃疊經官軍追剿該逆以一股牽掣我軍分股由廣濟翻山繞越蘄州濱湖一帶上竄經譚仁芳等截殺遂由棗茨嶺逸入上下巴河等處旋由黃岡麻城直趨岐亭新洲各路上竄黃陂官文見派常新阿等趕赴上游節節追剿並令喜昌等分防漢口等處著官文檄飭派出各軍實力嚴防扼要駐紮相機剿辦務期一鼓殲除毋得稍涉疏懈昨據僧格林沁官文奏追剿髮捻獲勝匪首馬融和等受撫陸續來歸者不下十餘萬眾等語該逆心存叵測首鼠兩端係屬意中之事著僧格林沁懍遵前旨暫駐黑石渡妥爲鎮撫並著官文妥籌辦理陳得才張總愚陳大澐等勢極窮蹙見在英霍潛太一帶形同流寇非合數

省兵力會剿無以制賊死命著僧格林沁官文嚴檄各軍前截後追兩面夾擊務將該逆等迅速擒獲毋令再行漏網致稽顯戮並著知照豫省官軍合力兜剿迅殄逆氛將此由六百里各諭令知之○以湖北廣濟剿賊不力革副都統常新阿蘇倫保溫德勒克西富森保提督藍斯明姜玉順總兵官楊朝林梁洪勝職撤勇號仍畱營予陣亡提督蕭河清祭葬世職加等諡忠壯入祀湖南北昭忠祠並於死事地方暨原籍建祠○己丑諭內閣沈葆楨奏瀝陳下忱懇恩歸養一摺江西巡撫沈葆楨自簡任以來於軍務吏治事事講求殫盡心力本年江甯逸賊竄擾江西該撫督軍防剿漸就肅清功績昭著朝廷正資倚畀茲據奏稱伊父母年逾七旬且多衰病懇請開缺回籍侍養情詞極爲肫摯本當俯如所請俾遂孝思惟江西見在軍務雖已告竣而一切善後事宜正須妥爲

經理該撫久任江西士民同深愛戴未便遽易生手沈葆楨著無庸開缺並賞給伊父母人蔭六兩交該撫祇領用資調攝該撫其仰體朝廷孜孜求治之心力圖報稱毋再固請○諭議政王軍機大臣等沈葆楨奏懇請歸養一摺沈葆楨以老親衰病鄉里告警迫切陳情原應俯如所請以遂其孝養之忱惟江省軍務雖已漸次戡定而按捕餘匪撫綏地方一切善後各事宜亟需賢能大吏實心經理該撫自抵任以來公忠體國爲守兼優於軍務吏治靡不刻意講求該省治理蒸蒸日上朝廷正冀倚畀自未便遽易生手且江西與福建相去甚近一俟親病稍愈卽堪迎養到署庭闈定省自可無間晨昏朝廷前畀該撫以疆寄時業已早爲籌及有旨諭知見在漳龍各郡縣賊勢鴟張著該撫趕緊抽撥勁旅赴閩協力保桑梓卽所以上慰椿萱沈葆楨著毋庸開缺惟當愼勉

圖功力求報稱以副委任母再固辭將此由五百里諭令知之○
諭駱秉章奏官軍攻剿滇黔各匪獲勝並越境克復仁懷縣城惲
世臨奏楚師肅清天柱各寨及東西籌防情形各一摺黔滇與川
省接壤隘口紛歧寇蹤時出沒敘永之間駱秉章此次所派劉嶽
昭等軍剿敗仁懷竄匪並越境攻克縣城實能不分畛域調度有
方見在仁懷縣城已有黔省兵練駐紮劉嶽陽等以遵義徧地皆
賊回顧邊防所有該處搜剿餘匪及遵義各屬號匪均須力籌掃
蕩勞崇光張亮基身任地方責無旁貸卽著督令該處兵練乘勝
剿洗無得專恃客兵貽誤疆事敘永一帶已爲該逆熟徑著駱秉
章飭在防各軍慎固封守嚴扼另股分竄如有應行越境會同黔
軍夾剿之處並著妥籌調度其竄擾黑堡之滇匪雖經擊敗由滇
境落竄去難保不復行窺伺著駱秉章督飭各營仍當加意嚴

防毋稍大意楚軍戈鑑等入黔肅清天柱各寨苗教各匪悉數退
歸清江台拱老巢戈鑑等各營已次第拔營回楚分固邊防其天
柱善後事宜勞崇光張亮基卽責成該地方文武妥籌辦理黔省
松桃銅仁一帶用兵日久永無了期惲世臨以湖南防黔兵勇合
計數千人深入則道路紛歧後無援師擬俟東路解嚴添調勁旅
萬人選派知兵大員分道入黔以爲一勞永逸之計所籌尙是著
卽豫籌調派一俟東路稍鬆卽行大舉入黔廓清兩省厯年邊患
毋得僅託空言或徒緩師期致負委任勞崇光張亮基亦當就見
有兵力力籌勦洗豈得以松銅一帶距省寫遠遂謂鞭長莫及委
爲他省應辦之事耶惲世臨另片奏趙煥聯帶勇駐紮江西龍泉
縣境以防東路竄賊請暫緩赴滇臬之任等語趙煥聯一軍前已
有旨令由桂陽桂東入粵會合南韶各軍以遏北江竄匪著惲世

臨仍遵前旨飭令該臬司妥籌會剿俟楚粵邊界肅清再令該員統帶舊部由貴州入滇順道將黔省下游各匪妥籌剿辦將此由六百里各諭令知之○予江西傷亡參將蕭高發等祭葬世職○庚寅諭內閣前因王有齡奏稱陣亡前署浙江鹽運使金衢嚴道繆梓偏執己見勘議株守以致省垣被陷請將該故員卹典撤銷業經奉 旨允准嗣據浙江舉人趙之謙等以該故員於杭城失陷時遇害最慘王有齡原參係屬傳聞之誤懇將該故員應得卹典開復遣抱告赴都察院呈訴當經降旨交左宗棠查明具奏茲據左宗棠奏稱查明該故員在浙服官多年素稱廉幹保守衢郡尤著勞績杭城被圍兩次派勇縋城斬賊並無堅不出戰之事及城陷時該故員猶登城拒戰身受多傷遇害尤爲慘烈王有齡奏參撤銷卹典實屬一時疏誤請將前得卹典給還等語繆梓著賞

還卹典以慰忠魂○諭議政王軍機大臣等臬司查無下落遴員
接署協濟楊岳斌行貲抵解甘餉存庫養廉銀兩作爲京餉滙兌
解京及劉典李榕均請開缺另簡各摺片張運蘭馳援武平縣城
孤軍挫陷身受重傷至今尙無下落所有福建按察使印信見存
汀郡刻下該處軍情緊急自應遴選知兵大員前往接署著照左
宗棠所請福建按察使卽著王德榜署理並飭令速帶所部由江
西瑞金入汀會合各軍實力攻剿毋稍遲誤其張運蘭實在下落
並著左宗棠徐宗幹查明具奏劉典見由左宗棠檄赴汀州剿賊
軍務喫緊之時未能遽准終養其浙江臬司本任卽毋庸先行開
缺見署臬篆之林聰彝如果閱歷尙淺於此缺不甚相宜卽著左
宗棠另派賢員接署或於鄰近省分另有所知人才亦可酌保數
員候旨簡用李榕見在皖北帶兵一時未能復任業准其開缺浙

江運司已簡放楊昌濬所遺浙江糧道一缺並令周開錫補授矣
馬新貽已屢經寄諭催令赴任著左宗棠再行咨催毋令延緩左
宗棠所陳浙江籌餉維艱甘餉無可措撥請籌銀四萬兩解交楊
岳斌應用抵作甘餉等語自係實在情形第楊岳斌募勇赴甘非
集成鉅款難以成行入甘以後協餉尤關緊要仍著左宗棠於無
可籌畫之中極力設法將欠解之四萬兩陸續解赴湖南以符前
撥八萬原額其甘省協餉並著源源籌解以維大局毋許藉詞推
諉京餉關係緊要仍著英桂徐宗幹遵照戶部原奏於閩海關及
茶稅欠解項內迅籌解納至養廉係左宗棠應得辦公之項該督
懇將養廉一萬兩抵餉解京之處礙難允其所請如業已滙兌來
京卽著英桂於關稅項下如數撥還可也將此由六百里各諭令
知之○諭張之萬等奏髮捻分股蔓延嚴扼豫邊並商城光山一

帶截剿竄賊各摺片前因僧格林沁等奏廣濟地方股匪竄擾黃
麻恐北犯豫防已令成保陳國瑞向光山一帶扼紮國瑞並選帶
馬隊馳往光州當經諭令會同張之萬督飭防軍奮力扼剿茲據
張之萬等奏賊由英山擾及商城邊境復由蘄水上犯逼近豫南
英山竄匪有陳大禧等在內商固一帶皆其熟徑其勢鋌而走險
漸有深入之虞而黃麻又與信陽羅山處處接壤亟宜嚴密扼剿
方免竄入腹地且張總愚陳大禧爲豫省積年巨患若不乘此大
兵雲集之際合力兜剿迅圖聚殲儻再令逃逸後患何時可已該
撫等已飭王文行等馳赴光羅適中之地探賊迎剿趙鴻舉等馳
赴商城邊境之蘇仙集會合張曜之軍夾擊卽著嚴飭各軍遇賊
卽擊毋令深入擾及完善蘇仙集之匪經張曜前隊親軍僧格林
沁所派之春壽馬隊合兵進偪賊向商城以北奔竄張曜繞至光

山一帶由北面橫截該匪由光山竄往西南亟宜乘其窮蹙一鼓殲擒普僧格林沁嚴飭春壽會合豫軍分路窮追毋令該逆得以喘息勦辦自易得手張之萬毛昶熙亦卽督催各軍盡力追擊並分飭沿途地方民團扼要堵截不可稍涉大意將此由六百里各諭令知之○以哈密勦回賞郡王伯錫爾黃纒○廣安徽太和縣學額四名○予雲南陣亡知州熊錫齡等祭葬世職○辛卯諭議政王軍機大臣等徐宗幹奏汀漳等處賊氛肆擾派兵防勦一摺據稱龍巖州踞賊日眾漳郡城賊未退焚殺慘虐並南靖平和相繼失守見在檄飭丁翼帶勇五百赴大田交界地方防堵委趙均帶勇千餘赴甯洋催林文察由同安一路進兵並撥隊前赴甯洋扼紮惟盼浙軍及援江各軍早抵閩境等語前據左宗棠奏稱閩省軍情緊急業經派令黃少春劉明珍赴邵武劉典赴汀州高連

陞赴福州見在汀漳賊勢猖獗著左宗棠分檄派出各員迅帶所部剋期入閩該督抵衢後仍著體察情形入閩督剿迅掃逆氛前因鮑超請假諭令左宗棠等卽飭宋國永婁雲慶分帶鮑超所部赴閩剿賊著曾國藩再行檄催該員等迅速前進歸左宗棠調遣毋失機宜江省兵勇可以抽撥入閩者沈葆楨此時當已酌量派往卽著迅催起程毋稍延緩左宗棠前派援閩之兵已有一萬八千而由江援閩者尙有宋國永數起兵力已厚徐宗幹當飭閩省兵勇併力協剿務將此股賊匪聚而殲旃省城防守事宜隨時與英桂妥籌布置毋稍大意漳郡紳民皆欲齊心殺賊義勇可嘉徐宗幹須乘機鼓勵以輔兵力曾玉明內渡已抵廈門卽著催令統領水師會同見派之陸軍相機兜剿毋得專待援軍致賊延蔓廣東自平遠失守後近日軍情未據毛鴻賓郭嵩燾馳奏見在該縣

是否克復李福泰出省已抵何處賊勢如何均著毛鴻賓等詳細具奏前據沈葆楨奏廣東嘉應大埔均已失守毛鴻賓等何以並未奏報卽著將各該州縣失守情形確實查奏毋稍粉飾此股賊匪雖已趨重閩疆而粵省邊隘多與閩省毗連隨處皆可四竄毛鴻賓等尤當力籌防剿不可稍有疏虞其王文瑞趙煥聯兩軍著毛鴻賓等分咨江西湖南催令迅速赴粵援剿劉連捷一軍昨據官文奏該員坐守皖境並未入楚等語此時鄂皖賊勢已蹙亟須一鼓作氣迅速殲除著曾國藩迅催劉連捷等軍剋日拔隊前進會合楚師前後夾擊或偕格林沁或官文調遣均須飭令遵調不得專候曾國藩到楚始行前進致誤事機徐宗幹摺內稱由六百里馳遞而發報時又用六百里加緊殊屬不合嗣後務歸畫一以符體制將此由六百里各諭令知之○壬辰諭議政王軍機大臣

等官文奏擊勦上竄髮逆獲勝擬俟楚境肅清卽飭溫德勒克西等赴甘援勦並陣斃藍成春各摺片賊匪由新洲倉子埠竄過黃陂勢將突撲漢口經官軍堵截該逆折回黃陂竄入孝感之楊店分股擾至九子墩雙廟等處經周鳳山等督軍分投截勦將白沙鋪賊館踰毀敗賊向三家店趙寺埠斗岡嶺分竄賊之前隊已至德安官文見令李成謀梁洪勝兩軍由應城天門繞出賊前迎擊江長貴嚴防襄樊隨棗張啟基等嚴扼襄河等處水路著嚴飭派出各軍兩路緊躡合力勦洗爲一鼓聚殲之計以期迅殄逆氛至官文所稱溫德勒克西等馬步各軍若賊西竄卽可跟蹤追擊就便入甘等語該督如令溫德勒克西等督軍西迫勢將縱賊入秦又成不了之局官文惟當督飭該員等將黃孝德安等處之賊實力勦辦就近殄除毋得以鄰爲壑致令窮蹙之賊復肆猖獗俟此

股賊匪殄滅卽令溫德勒克西等馳赴甘省以厚兵力僧格林沁見在追賊赴皖據官文奏稱楚軍均已回鄂何以並不會同該親王之軍協力掃蕩其應如何撥兵前赴皖豫交界越境追剿以固邊圉之處並著官文妥籌辦理前據僧格林沁官文奏稱僞將甘懷德等誘令僞端王藍成春至成保營前投降當將藍成春解送到營訊明後卽將該逆凌遲處死茲據官文奏成大吉在麻城之木牌樓地方將藍呈春已殪於陣所奏情節前後不符該逆藍呈春是否卽係藍成春究竟在何處殲斃著僧格林沁官文確切查明具奏將此由六百里各諭令知之○諭前因穆圖善帶兵出關甯靈一帶兵力單薄諭令德勒克多爾濟桂成酌挑精兵一千名赴都興阿軍營調遣茲據奏稱綏遠歸化防務緊要口外各廳多與甘境毗連歸化回戶眾多良莠溷雜城小而不固又無堡壘可

守統兩城存營兵僅千名緩急尙難兼顧至沿邊沿河駐紮滿蒙等兵口岸過多猶虞不敷分布冬令河凍防務尤不可稍鬆請仍停抽調赴甘等語所奏自係實在情形歸綏官兵卽著暫緩抽調德勒克多爾濟桂成惟當飭令在防各軍加意戒備慎固邊圉甯靈回匪被剿窮蹙卽恐有東竄之意其駐紮磴口沿河一帶之蒙古官兵防堵尤關緊要著卽於伊克昭各盟內就近添調勁旅擇要分段巡防毋稍大意都興阿亦當就見有兵力聯絡甯夏官兵將甯靈一帶之賊妥籌剿辦以期及早廓清德勒克多爾濟等另片奏伊克昭蒙古官兵駐防沿河沿邊一帶口糧欠發日久軍械亦不得力擬由綏遠庫存烏槍內撥給三百桿所需藥鉛由歸綏道發給先給一月口糧於糧餉廳庫存儲款內暫行動支卽著照所請行嗣後該官兵口糧並著沈桂芬與防兵一律籌款發給毋

令缺乏以示體恤至兩盟蒙古自設防以來籌備駝馬口糧等項該滿蒙旗綠官兵駐防兩載亦不無微勞足錄著准由德勒克多爾濟等擇尤請獎毋許冒濫將此由五百里各諭令知之○癸巳諭內閣前因常清奏葉爾羌參贊大臣景廉因病咨請開缺曾經賞假一箇月調理嗣據奎棟奏景廉已於拜摺後起程進口當以該大臣並不靜候諭旨擅自交卸起程降旨嚴行申飭仍令迅速折回本任景廉於行抵歸化後又經德勒克多爾濟代爲陳請復行賞假一月飭令病勢稍愈卽行折回茲復據德勒克多爾濟奏據景廉呈稱病勢日深懇請開缺回籍並委員驗看該大員病勢實係沈重等語景廉身膺邊寄職守攸關縱使病非虛捏亦當候旨遵行何得擅自起程且新疆見當多事之秋防剿均關緊要該大臣藉病推諉徑行離任謂非規避取巧其誰信之景廉著卽行

革職仍著德勒克多爾濟飭令在歸化城趕緊醫治一俟稍痊卽行發往都興阿軍營聽候差委不准藉詞再行逗畱致干罪戾○諭議政王軍機大臣等都興阿等奏穆圖善督兵到營擬進攻甯夏請嚴催解餉一摺穆圖善一軍前有旨令其統帶出關駐紮哈密茲據奏稱該將軍所部僅止步隊五千馬隊兩起難以獨攻一路而前敵兵數更單且相隔數百里勢難聯絡必須合兵先攻甯夏穆圖善已轉回定邊刻期由草地渡河會同前敵進剿所籌尙妥著卽會合杜嘎爾之軍進攻甯夏殲除醜黨俟甯夏克復後再行整兵出關都興阿務當督飭杜嘎爾等隨同穆圖善奮勉圖功仍隨時與甯夏各營聯絡聲勢一鼓成功當此冬寒餉糈支絀兵勇飢困自在意中所有山西陝西每月應解穆圖善軍餉二萬兩著沈桂芬劉蓉各先撥兩箇月飛速運解至都興阿馬隊每月應

由山西解銀一萬五千兩西蒙克西克陳天佑等營應由陝西籌解月餉並著該撫等趕緊撥解毋得再事耽延致誤軍食另片奏請催直晉官兵軍餉翁同書所帶直晉官兵積欠至兩月之久凍餒不堪言狀著劉長佑沈桂芬源源撥解其積欠餉銀著一併如數撥解又片奏山西茅津渡駐防之楚勇一千名素稱精壯請調撥赴甘原調之大同一千名擬遣撤回晉等語山西防務已鬆著沈桂芬即將派防茅津渡之楚勇一千名撥赴甘肅歸穆圖善統帶俟此項勇丁到營即將原調之大同兵一千名遣撤回晉彼時如尙須防河再由該撫奏請調派以期兩無所失楚勇口糧卽照該將軍等所請每月加解銀六千五百兩務須按月接濟毋得稍分畛域致有譁潰之虞雷正綰於攻克蓮花城後令陶茂林督率十七營赴蘭垣前有旨令將趙必達等軍歸陶茂林統帶該提督

是否已到省垣嗣後蘭州一帶軍情卽由陶茂林會同恩麟迅速馳奏雷正綰回軍平涼著卽審度軍勢恢復固原以便節節北趨與都興阿等合兵夾擊肅清甯靈一路曹克忠暫紮蓮花城何路緊要卽調派援應以期早日廓清用慰朝廷軫念西陲之意將此由六百里諭知都興阿穆圖善雷正綰劉長佑沈桂芬劉蓉並傳諭陶茂林知之○甲午諭議政王軍機大臣等喬松年奏扶逆就殄皖省賊蹤淨盡並陳見辦情形一摺髮捻各匪前經僧格林沁等督軍追剿受降十餘萬眾旬日之內漸就廓清惟扶逆陳德才一股尙在後路經蔣凝學一軍自楚追及疊獲勝仗殺賊甚眾收降三萬餘人僧格林沁亦由霍山派兵進擊該逆前後受敵計窮服毒身死蔣凝學將該逆屍身搜獲送至僧格林沁軍官查驗皖北一律肅清此股髮逆竄擾楚皖陝豫已及十年陳德才曾擾蘇

州尤屬著名巨匪見在計窮身死洵足寒賊膽而快人心所獲是否陳得才正身卽著僧格林沁查明具奏髮逆漸就殄滅惟捻匪陳大澧張總愚兩首逆前據僧格林沁奏俱在英霍潛太一帶山內伏匿已飛咨喬松年一體搜拏仍著僧格林沁喬松年嚴飭該處帶兵將弁分投搜緝務在必獲前據官文奏稱賊之前隊已至德安已令李成謀繞前截擊皖省見無賊蹤著喬松年督飭蔣凝學等軍馳赴楚境會合夾擊以收聚殲之效豫省距楚較近前據張之萬奏賊由英山擾及商城邊界復由蘄水逼近豫南該撫已派王文行張曜等軍迎剿當經諭令張之萬督軍追剿扼要堵截並著喬松年選派皖防將弁帶兵前赴豫疆與豫省各軍併力兜擊務期盡殲醜類將此由六百里各諭令知之○以安徽官軍殄滅首逆陳得才賞還道員蔣凝學布政使銜予提督張得勝何紹

彩優敘○丙申諭內閣前因曾國藩奏江甯克復請將廣東釐金應協江皖之七成停止當以江甯餉源未裕未經允行嗣據戶部奏廣東軍需緊急餉項浩繁曾於應解江皖七成釐金內准令該省再酌畱四成以資支應茲復據曾國藩奏粵省見有軍事釐金解江終覺於理未安請仍令該省全數截畱等語該大臣於廣東釐金以爲非應得之款形諸章奏不啻再三此時復以粵東見有軍需仍請停止籌畫實爲周至嗣後廣東釐金卽著該省全數截畱俟軍事稍平再行酌解曾國藩軍營彌補欠餉江西釐金自本年沈葆楨奏定與皖營各提一半曾國藩嗣派鮑超周寬世兩軍赴援江西卽將此一半釐金畱充該兩軍之餉茲據曾國藩請將江西釐務概歸沈葆楨經收其該兩軍口糧自應由沈葆楨妥籌給發嗣後江西釐金卽著照曾國藩所請由沈葆楨派員經收並

將鮑超周寬世兩軍口糧妥爲接濟毋令缺乏其饒州景德鎮兩卡仍著照舊撥解祁門糧臺以資饋運至曾國藩之軍見在分駐金陵及皖南北者爲數尙眾其防兵口糧及將來撤勇欠餉自應妥爲籌備蘇皖皆該督所轄省分所有該二省監務釐卡仍著照舊撥解由曾國藩提川○諭議政王軍機大臣等曾國藩奏請將粵釐停止並江西釐務請概歸沈葆楨經收等語業經明降諭旨照所請行矣粵釐本爲江皖協餉一大宗毛鴻賓郭嵩燾從前屢以餉需竭蹶分成解皖存畱不過涓滴爲言此後全數畱充該省軍需餉源不爲不裕毛鴻賓郭嵩燾惟當撙節動支以期日有起色至廣東及粵海關應解京餉總未能如期報解該省既得此鉅款更不得以餉項支絀藉詞延宕嗣後著該督撫並粵海關將應解京餉遵照部定期限趕緊如數報解無得藉口抽收未旺再行

遲緩致誤要需江西釐金自曾國藩奏派鮑超周寬世兩軍赴援江西後其應行解皖之半釐即畱充該兩軍之餉是江省釐金雖有協皖之名已無解皖之實曾國藩見復請將該省釐務概歸沈葆楨經收其鮑超周寬世兩軍自應由該省妥籌供應見在瑞金等處餘股未淨閩粵之賊尙虞回竄該兩軍自難卽撤著沈葆楨將此兩軍妥爲調度其應給口糧卽由沈葆楨給發以清界限至江省饒州景德鎮兩卡本係提出作爲祁門糧臺辦米之需嗣後仍著照舊撥解祁臺以資饋運將此由五百里各諭令知之○諭曾國藩奏道赴皖鄂交界督兵擬仍駐紮安慶六安等處派劉連捷等入黃州歸官文調遣並調劉銘傳等率淮勇渡江北剿一摺前因楚皖賊勢甚眾僧格林沁官文均未得手是以諭令曾國藩赴楚皖交界督師剿賊嗣據僧格林沁等先後奏報蕪水獲勝成

大吉軍解圍賊竄英山等處經僧格林沁等督師進剿擒獲首逆多名降者十餘萬眾昨又據喬松年奏報扶逆陳得才自戕髮逆剿除淨盡皖省一律肅清是楚皖近日軍情較之半月以前大不相同見在楚境餘賊由黃孝竄德安一帶逆數無多楚軍可敷剿辦曾國藩又派劉連捷等軍入楚歸官文調遣計日定可廓清著卽飭令劉連捷李鶴章劉銘傳等軍迅赴黃州德安等處遇賊卽擊如賊趨皖豫並令各軍分投防剿通力合作爲一勞永逸之計曾國藩卽可毋庸前赴安慶亦無須交卽督篆仍駐紮金陵妥籌調度李鴻章見在入閩監臨俟出閩後仍回江蘇巡撫本任並咨行吳棠富明阿各回本任江蘇各郡縣新復規制脩定一切理財用人撫綏安輯諸事宜非老成碩畫眞能視國如家者不克勝此鉅任曾國藩惟當仰體朝廷倚畀之重次第經畫奠安黎元所有

覈算報銷及籌餉撤勇諸事宜卽在金陵督飭司道從容辦理不
得遽萌功成身退之志用副厚望將此由六百里各諭令知之○
諭張集馨奏敬陳各軍分道進剿並籌畫糧餉章程一摺雷正綰
一軍攻拔蓮花城後見由涇州北原進兵規取鹽固並調曹克忠
八營幫同進剿分撥六營屯紮秦州天水以防回逆分竄陝疆卽
著都興阿雷正綰督飭各軍迅克固原併攻鹽茶將各村逆窟悉
數掃除疏通驛路卽可由靖遠直達蘭垣屆時或助剿甯靈或進
援西甯如河州賊勢鴟張兼可分兵馳應並著雷正綰隨時會商
都興阿等妥籌辦理陶茂林所部各營前經雷正綰檄令由靜甯
徑赴蘭州卽著迅解靜甯之圍馳赴省垣將省防布置妥帖卽由
河干沙泥一帶東行促解河州城圍收復狄道仍飭該提督步步
爲營穩慎進取毋得稍有疏虞前據都興阿等奏稱穆圖善已由

定邊草地渡河會合杜嘎爾之軍進攻甯夏並著該將軍懷遵前
旨與前敵聯絡聲勢奮勉圖攻以副委任都興阿雷正綰俟克復
固原後如甯靈一路兵力尙單見紮慶陽防守之八營能否調往
助剿並著屆期會籌妥辦甘省督標城守六營弁兵千餘均係回
籍中軍副將趙秉鑑左右多係回弁張集馨請俟雷正綰到省後
將回弁回兵訓入大營隨剿有無窒礙抑應作何彈壓撫馭之處
著雷正綰張集馨會同恩麟慎密酌辦張集馨於拜摺後馳赴平
涼著將應辦一切機宜與雷正綰悉心籌商布置妥協仍遵前旨
迅赴蘭垣於行抵蘭州後卽行馳奏所有簡閱兵勇鎮撫回眾各
事宜並著照所擬商同都興阿雷正綰陶茂林恩麟等迅籌妥辦
甘省需餉孔殷張集馨與雷正綰商委知縣張清濟等分赴三水
等處勸捐濟餉如能集有成數卽由雷正綰等從速奏獎以示鼓

勸並著恩麟飭甯州靈臺鎮原正甯四屬將曹克忠各營所需糧石妥籌供支其隆德靜甯各屬距鹽固較近並飭隨時解濟以資軍食雷正綰仍當懷遵前旨迅拔固原節節北趨與都興阿聯絡夾擊迅殲醜黨克蒞全功以慰懸望將此由六百里諭知都興阿穆圖善雷正綰並傳諭陶茂林恩麟張集馨知之○諭張集馨奏通盤籌畫餉需一招據稱雷正綰馬步二十八營月需餉銀八萬數千兩而製造帳房修理軍械等款尙不在內曹克忠馬步十六營陶茂林馬步十八營每軍各月需銀數萬兩向由陝西供支該省餉源枯竭雖有報解杯水車薪亦屬無濟部撥之款各直省督撫均以自顧不遑未能如期籌撥見與雷正綰籌商自本年臘月起以半年爲率甘肅腹地軍務可期大有起色不至再累鄰疆查湖北從前協濟多隆阿營每月三萬五千兩並協撥軍火等件嗣

多營裁撤協餉亦停請飭湖北督撫仍照協濟多營數目籌解半年山西河東鹽課四十餘萬兩向係協撥甘餉自必照章運解請飭山西每月再籌三萬兩四川每月籌解銀二萬兩直隸山東河南每月各籌解銀一萬兩概以半年爲率等語甘省餉項奇絀係屬實在情形既據張集馨與雷正綰籌商自臘月起以半年爲率甘省軍務可期速了該督撫自當竭力籌撥以期眾擎易舉力保邊疆著官文吳昌壽仍照協濟多隆阿營章程每月解銀三萬五千兩並將軍火等件源源接濟山西除將河東鹽課四十餘萬協撥甘餉外著沈桂芬每月再籌解銀三萬兩駱秉章每月籌解銀二萬兩劉長佑閻敬銘張之萬每月各籌解銀一萬兩均以半年爲率該督撫等務當如數籌撥按月批解甘省毋令缺乏將此由五百里各諭令知之○河南巡撫張之萬等奏春壽張曜等軍追

賊於羅山之宣化鎮擒斬甚多匪向西南竄去見飭各軍合剿得旨竄往西南之匪固應嚴防回竄豫疆仍應嚴飭張曜王文行等軍會合楚軍夾剿聚而殲旃毋畱餘孽○予浙江殉難署布政使道員麟趾祭葬世職如布政使例諡壯介入祀昭忠祠母瓜爾佳薩克達氏暨子女旌卹如例○引見已革江甯布政使楊能格得旨著以按察使候補發往都興阿軍營差遣委用○允曾國藩請建昭忠祠於江甯府祀湘軍陣亡將士○是月蠲免河南信陽等十一州縣被擾新舊額賦浙江西安等八縣被擾積欠額賦蠲緩直隸開州等三十六州縣水旱雹災新舊額賦緩徵山西薩拉齊廳水災新舊額賦